


MPHATO WA 2 LELEME LA GAE

Paesekela ye mpsha ya Mogoroši




SEPEDI



Puku ya

1



Go bala ka sehlopha ga go hlahlwa

Pele o bala

- Phetlolla matlakala a kanegelo yeo ba tliego go e bala. Boledišanang ka ga diswantšho.
- Kgopela barutwana gore ba nagane gore kanegelo e ka ba mabapi le eng ka go lebelela hlogo ya kanegelo le diswantšho.
- Hlagiša mantšu a maswa goba a bothata pele barutwana ba ka bala kanegelo.
- Dira dikarata tša mantšu e le go hlagiša tloltontšu ye mpsha (lebelela lenaneo ia tloltontšu ye mpsha kua bokagareng bja letlakala la mafelelo la khabara.

Go bala la mathomo

- Barutwana ba swanetše go bala sengwalwa ka bobona
- Barutwana ba swanetše go bala ka setu goba ba ka bala ka go hebehebetša
- Tloga go morutwana yo o ye go yo mongwe, gomme o kgopele morutwana yo yo mongwe le yo mongwe gore a balele karolo ye nngwe ya sengwalwa godimo

Ditherišano

- Botšiša dipotšišo tša tekatlhao loganyo tše di theilwego godimo ga sengwalwa
- O tla lemoga gore mešongwana ye e lego kua mafelelong a puku e bohlokwa go hlahlha ditherišano ka phapošing. (Kgetha mešongwana ya maleba yeo e swanelago boemo bja barutwana.)

Go bala labobedi.

- Mo go matšatši ao a latelago, dumelela barutwana go bala puku gape, ka babedi ka babedi goba morutwana a le noši.
- Ela šedi go bala ka go thelela, popopolelo le tloltontšu.
- E re barutwana ba ngwale mešongwana ya dihllopha ya go hlahlwa yeo e lego kua mafelelong a puku. (Kgetha mešongwana ya maleba yeo e swanelago boemo bja barutwana.)

E re barutwana ba diragatše diteng tša
sengwalwa ge go kgonega.




Barutwana ba swanetše go dira mešongwana ye e theilwego godimo ga go bala ka dihllopha ka morago ga ge ba badile. E re barutwana ba šome ka dihllopha go ngwala mešongwana ya maleba ya go bala ka dihllopha yeo e lego kua mafelelong a puku. Ba se ke ba ngwala ka pukung ye. Mešongwana ya go ngwalwa e swanetše go ngwalwa ka dipukung tša bona tša go ngwalela.

Paesekela ye mpsha ya Mogoroši



Bagwera ba Mogoroši ka moka
ba be ba na le dipaesekela.
Mogoroši o be a kganyoga
go ba le paesekela.
O be a bogela ge bagwera ba
gagwe ba nametše dipaesekela
tša bona, ba eya sekolong.
"Aowi! Ke duma ge nkabe ke na
le paesekela," A realo Mogoroši.



Ke moka, ge Mogoroši a fetša
mengwaga ye seswai, batswadi
ba gagwe ba ile ba mo
rekela paesekela ye
khubedu.

Mogoroši o be a
thabile kudu. "Etlang
le bone!" Mogoroši a
goeleta ka lethabo ka
lentšu la godimo. "Ke
kgale ke ntše ke nyaka
go ba le paesekela. Bjale
ke tla kgon a go sepela le
bagwera ba ka."





Mogoroši o be a thabile
kudu. O ile a tabogela
godimo ga paesekela ya
gagwe ye mpsha, eupša
o ile a wela ka thoka
yela ga yona.

O ile a leka gape,
gomme a wa gape,
le gape le gape.

Mogoroši o be a sa
kgone go namela
paesekela.





Aowi! Bjale ke
tlo dirang?

O ile a kgorometša paesekela go fihla ka phapošing ya gagwe. E be e eme kgauswi le bolao bja gagwe. Tšatši le lengwe le le lengwe o be a e pholeša gore e šale e phadima.

Mogoroši o ile a lebelela paesekela. "Ke kganyoga ge nkabe ke kgonà go e namela," a nagana. "Ke swanetše go loga leano."




"Mogoroši, etla o sepele le rena,"
bagwera ba gagwe ba mo goelela.


"Ke theogetše, ke pholeša
paesekela ya ka," Mogoroši
a araba.

"O reng o sa ye ka ntle
wa ya go sepela le
bagwera ba gago?"
gwa botšiša
mmago Mogoroši.

"Ke sa lokiša nakana ya
yona," Mogoroši a realo.




Mogoroši ga se a botša motho
sephiri sa gagwe. Mogoroši o be a
sa kgone go namela paesekela.



Bošego bjo bongwe le bjo
bongwe Mogoroši o be
a eya ka tšhengwaneng
gomme a leka go ithuta go
namela paesekela mola a sa
bonwe ke motho.

Mogoroši wa batho! O be a
fela a ewa. Go se go ye kae,
ke ge a tletše mesego le
mengwapo.





Bošego bjo bongwe, mogwera
wa gagwe Jane, o ile a bona
Mogoroši a leka go namela
paesekela ya gagwe.

Mosetsana o ile a kitimela ka
ntle gomme a re: "Mogoroši,
e re ke sware paesekela,
gore o kgone go namela."



Jane o ile a swara paesekela
gomme a kitima ka morago
ga Mogoroši.

O ile a wa gatee, a wa
gabedi, gomme ga se
a wa gape.

"Ke kgon a go dula
gabotse, ke kgon a go
e namela!" gwa goelela
Mogoroši.





Mogoroši o ile a otlela
ka lebelo, ka lebelo,
Jane a dutše a kitima
ka morago ga gagwe.

Ka morago, šole! A
tloga le Raki e kitima
kgauswi le yena.
"Šatee!" Jane a goelela.
"Šatee!" Mogoroši a
goelela a dutše a nametše
a bonegetšwe ke ngwedi.





Ke kgona go dula
gabotse!

Ke kgona go e
namela!

Letšatši le le latelago Mogoroši o
ile sekolong le bagwera ba gagwe
ka paesekela ya gagwe. O be a
thabile ka gobane o ile a no tšwela
pele go leka, go fihla ge a kgoná.

Ge o sa tšwelele la mathomo
o swanetše go leka gape,
le gape le gape!



Mešongwana ya go bala ka sehlopha



1

Lebelela diswantšho tše.

Botša mogwera wa gago gore:

- go direga eng seswantšhong se sengwe le se sengwe.
- ke seswantšho sefe seo se swanetšego go ba sa mathomo, ke sefe sa bobedi le gore ke sefe sa boraro.
- ke hlogo efe ye e nyalelanago le seswantšho, se itšego go tše di latelago.



Mogoroši o ile sekolong ka paesekela ya gagwe.

Jane o thušitše Mogoroši go kgoni go namela paesekela.

Batswadi ba Mogoroši ba mo reketše paesekela.



2

Balela mogwera wa gago mafoko a a latelago. Ka morago o beakanye mafoko a ka tatelano ya maleba.

- Mogoroši o ile sekolong ka paesekela ya gagwe.
- Mogoroši o be a kganyoga ge nkabe a na le paesekela.
- Jane o thušitše Mogoroši go kgoni go namela paesekela.
- Mogoroši o be a sa kgone go namela paesekela.
- Mogoroši o hweditše paesekela e le mpho ya letšatši la matswalo a gagwe.



3

Šomiša medumo ye go feleletša
mantšu gore a nyalelane le
diswantšho.

ts	gw	bj	th	ph	s
					
__ang	__ebe		se __ agwa		
					
__utlwa	__ešepe			__iri	



4

Ngwalolla lefoko la pele ga la mafelelo
la kanegelo ka pukung ya gago ya go
ngwalela.

Thala seswantšho go hlaloša lefoko leo.



5

Bjale bolela ka ga kanegelo.

- Go direga eng mathomong a kanegelo?
- Go direga eng bogareng bja kanegelo?
- Naa kanegelo e fela bjang?



6

Araba dipotšišo tše di latelago.

- a. Efa hlogo ya kanegelo.
- b. Baanegwathwadi ke bomang mo kanegelong?
- c. Naa o nagana gore ke ka lebaka la eng Mogoroši a be a sa nyake go sepela ka paesekela le bagwera ba gagwe?
- d. Mogoroši o dirile leano lefe gore a ithute go namela paesekela?
- e. Naa o nagana gore Jane o be a le mogwera wa go loka? Ke ka lebaka la eng o realo?
- f. Naa leina le lengwe la paesekela ke eng?
- g. Ke potšišo efe ye o nyakago go e botšiša morutiši wa gago ka ga kanegelo ye? Ke ka lebaka la eng o realo?



7

Akanya o le Mogoroši. Ngwalela Jane karata ya go mo leboga ka ge a go thušitše.

E TŠWA GO



a rategago

E tšwa go _____

MPHATO WA 2 LELEME LA GAE



Puku ya 1

Hlogo:	Paesekela ye mpsha ya Mogoroši
Leleme:	Sepedi
Kgato ya:	Puku ya go bala Mphato wa 2 Kgato ya 3 Puku ya 1
Mohuta wa sengwalwa:	Kanegelo
Mantšu a tlwaelo:	kgora, mpho, kudu, thabile, tseba, bagwera, eng, ka morago, morago
Tlotlontšu:	kganyoga, letšatši la matswalo, thabile, goelela, thwi, pholeša, sephiri, mengwapo, lekanyetša, ngwedi
Medumo:	bj, ts, th, ph, tl, s, kg, oo, ee, ou, ae, ea
Diteng, marel le mabokgoni:	<ul style="list-style-type: none">Go ngwalolla le go thala seswantšho seo se hlalošago lefoko la pele ga la mafelelo la kanegelo.Go bolela kanegelo ka go tšweletša mathomo, bogare le mafelelo a yona.Go bala le go araba dipotšišo tšeо di theilwego godimo ga kanegelo.Go ngwala karata ya go leboga.

SEPHOLEKE (CAPS) se nyaka gore
barutiši ba bee nako ka thoko letšatši ka
letšatši go bala ka sehlopha se se itšego sa
go hlahlwa.

Go bala ka sehlopha sa go hlahlwa go nyaka
gore barutwana bao ba lego maemong a go
lekana ka go bala ba bale sengwalwa sa go
swana, ka dihlopha ka tlhahlo ya morutiši.

Morutiši o swanetše go beakanya paka ya
go bala gore e akaretše mekgwana ya go
bala go ya ka go bala ka go bona mantšu le
difoneme le ya kwešišo yeo barutwana ba
tla e hlokago ge ba bala.


Gape mekgwana ye ya go bala e nyaka gore
go be "go bolelwa ka sengwalwa" magare
ga morutiši le bana gape le magare ga
barutwana mo sehlopheng.

Dipuku tše di akaretša 'go bolela
ka sengwalwa' tekatlhao loganyo le
mešongwana ye mengwe ya go thuša
barutiši gore ba kgone go hlahlha go bala ka
sehlopha ka diphapošing tše bona.

ISBN 978-1-4315-2513-3



9 781431 525133



ISBN 978-1-4315-2513-3

**THIS BOOK MAY NOT
BE SOLD.**



basic education

Department:
Basic Education
REPUBLIC OF SOUTH AFRICA

Published by the Department of Basic Education
222 Struben Street, Pretoria
South Africa

© Department of Basic Education
First edition 2016

The Department of Basic Education has made every effort to trace copyright
holders but if any have been inadvertently overlooked, the Department will
be pleased to make the necessary arrangements at the first opportunity.

Dipuku tše dingwe tše
Leleme la gae tše Mphato
wa 2 Rakeng ya dipuku:



Boati o hwetša bagwera
ba baswa

Bophelo bjo boima

Ka fao pitsi e hweditšego
mebala ya yona

Jerry o rata go bala



Bubu, ngwana wa tlou
o a timela

Bagwera ba direlana bjalo

Lepidibitšana la go befa



Paesekela ye mpsha
ya Mogorosi

Diphoofolo di etela lewatle

Leru Leruarua, o a pholosa